

## Morning Regional Dogri News Bulletin, 31<sup>st</sup> May 2024

मार्निंग डोगरी न्यूज़ बुलेटिन, समें. 09-20 Hrs



### Headlines

- लोकसभा चुनावें दे 7में ते खीरले गेड़ लेई तैआरियां पूरियां, एहदे तैह्त कल 57 संसदीय हल्कें च वोट पाए जांगन।
- टखनूर च होए दे शिड़क हादसे च मरने आलें दी गिनतरी 22 पुज्जी। प्रधानमंत्री ते उपराज्यपाल होरें मारे गेदे लोकें दे नेड़में रिश्तेदारें लेई सिधी सहायता दी घोषणा कीती।
- मुख्ख सचिव होरें जम्मू श्रीनगर राश्ट्रीस जरनैली शिड़कै पर गड्डिडएं दी आओजाई सुचारू बनाने लेई 10 जून दी तरीक तैह कीती ऐ।
- भारतीय रिजर्व बैंक मजूदा माली ब'रे च आर्थिक वृद्धि दा 7 फीसद रौहने दा अनुमान जताया ऐ।



### LS Election 7<sup>th</sup> Phase

लोकसभा चुनावें दे 7में ते खीरले गेड़ तैह्त कल वोट पाए जांगन। 8एं राज्यें ते केन्द्र शासत प्रदेश दी 57 लोकसभा सीटें लेई कल मतदान होग। इस गेड़ च उत्तर प्रदेश ते पंजाब दी 13-13 सीटें, पच्छिम बंगाल दी 9, बिहार दी 8, ओडिशा दी 6, हिमाचल प्रदेश दी 4, झारखंड दी 3 ते चंडीगढ़ दी इक सीट पर वोट पाए जांगन। वोट पाने आला कम्म बडलै 7 बजे शुरू होग। केई सारे नेताएं दे सियासी भविक्ख दा फैसला कल ईवीएम च बंद होई जाग। इनें मेदवारें च बीजेपी दे वरिष्ठ नेता नरेन्द्र मोदी ते अनुराग सिंह ठाकुर, कांग्रेस दे विक्रम आदित्य सिंह, टीएमसी नेता अभिषेक बनर्जी होर शामिल न। मतदान प्रक्रिया गी सुचारू ते रमानदारी आले ढंगै सिर करोआने लेई चुनावें आयोग आस्सेआ व्यापक इंतजाम कीते गे न। मतदाताएं लेई मतदान केन्द्रें पर बुनियादी सहूलतां जियां पीने आला पानी, शौचालय, व्हील चेयर, बिजली बगैरा दी बवस्था कीती गेदी ऐ तां जे हर मतदाता गी असानी होई सकै। प्रदेश चुनावें सरबंधी अफसर, जिला चुनावें अधिकारी ते होरने सरबंधी अमले गी हिदायत दिक्ती गेई ऐ जे ओह गर्मी दे मौसम गी दिक्खदे होई लोड़चदे बंदोबस्त करियै रखन। मतदान केन्द्रें पर सुरक्षा बंदोबस्तें गी निग्गर बनाया गेआ ऐ तां जे कुसै बी माड़ी घटना गी रोकेआ जाई सकै ते चुनावें प्रक्रिया गी आताद ते निरपक्ख ढंगै सिर तोड़ चाढ़ेआ जाई सकै।



## Kathua Counting

उधमपुर-कठुआ संसदीय हल्के लेई पाए गेदे वोटें दी गिनतरी आले कम्मं आस्तै चुनां प्रशासन लोड़चदे बंदोबस्त करा रदा ऐ। आकाशवाणी जम्मू संवाददाता दी रिपोर्ट मूजब उधमपुर पार्लिमानी हल्के लेई कुल 12 मेदवार चुनां मैदान च हे। वोटें दी गिनतरी आला कम्म कठुआ दे सरकारी डिग्री कालेज च होग। एहदे लेई बहु-स्तरीय सुरक्षा ते सीसीटीवी दी निगरानी दी बवस्था बी कीती गई ऐ। कठुआ, उधमपुर, डोडा, रामबन ते किश्तवाड़ दे 18 विधानसभा हल्के च पाए गेदे वोटें दी गिनतरी आला कम्म तैह थाहर ते हॉल च कीता जाग। तकरीबन 18 जहार अमले गी गिनतरी आले कम्मं लेई रखेआ गेआ ऐ।



## Akhnoor Accident

जम्मू दे अखनूर च कल होए दे बस हादसे च मरने आलें दी गिनतरी 22एं तोड़ी जाई पुज्जी ऐ। हादसे च घायल होए दे 57 जनें दा एसडीएच अखनूर ते जीएमसी अस्पताल जम्मू च इलाज चला करदा ऐ। आकाशवाणी दे जम्मू संवाददाता नै खबर दित्ती ऐ जे एह हादसा उसलै होआ जिसलै उत्तर प्रदेश ते राजस्थान थमां यात्राए गी रियासी जिले च शिव खोड़ी लेइयै जा करदी इक बस डूहगे नाले च रूलकी पेई। एह हादसा जम्मू जिले दे अखनूर इलाके च चौकी चौरा बेल्ट दे टुंगी मोड़ थाहर होआ। हादसे दे तुरत मगरा मकामी लोक, पुलस ते फौज मौके पर पुज्जी गई ते बचाह कारवाई शुरू कीती। ट्रैफिक पुलस दे एसएसपी, ट्रांसपोर्ट कमीशनर ते होर अधिकारी बी मौके पर पुज्जी गे। जम्मू दे डिवीजनल कमीशनर ते एडीजीपी जम्मू संजा चिरें जनेई जीएमसी अस्पताल जम्मू पुज्जे ते घायलें दी डोल पुच्छी। तोआई जम्मू दे जिला मैजिस्ट्रेट होरें हादसे दी मैजिस्ट्रियल जांच कराने दे आदेश दित्ते न। बस हादसे बारे कोइ सुआल जां सहायता लेई नंबर जारी कीते गे न। डी. एमदफ्तर दे नंबर न 96226-99666 ते 94191-60547, एस.पी दफ्तर दे नंबर न 94191-72197, 94191-94102 ते मैडिकल सरबंधी नंबर च 94191-90500, 94191-90493।



## President-VP-PM

राश्ट्रपति, उपराश्ट्रपति ते प्रधानमंत्री होरें अखनूर च होए दे बस हादसे च जानी नुकसान पर दुख जाहर कीता ऐ। राश्ट्रपति द्रौपदी मुर्मू होरें आखेआ ऐ जे बस हादसे च जानी नुकसान होने पर उनेंगी दुख पुज्जेआ ऐ। उनें हादसे च घायल होए दे लोकें दी तौले नरोए होने दी कामना कीती ऐ। उपराश्ट्रपति जगदीप धनखड़ होरें आखेआ जे दुखदारी बस हादसे बारे पता लगने मगरा उनेंगी डूहंगा दुख पुज्जा ऐ।

प्रधानमंत्री नरेन्द्र मोदी होरें मरने आलें दे परोआर आले कन्नै डूहगा बसोस प्रकट कीता ते उंदे परोआर आलें लेईदो-दो लक्ख ते घायलें गी 50-50 ज्हार रपे दी फौरी मदाद देने दी घोषणा कीती । प्रधानमंत्री हुंदे दफतरै च राज्यमंत्री डॉ. जितेन्द्र सिंह होरें बी हादसे पर बसोस प्रकट कीता ऐ ।



## LG-Condolence

उपराज्यपाल मनोज सिन्हा होरें इस हादसे पर डूहगा दुख ते बसोस जाहर कीता ऐ । उनें मारे गेदे लोकें दे नेडमे रिश्तेदारें लेई सिधी मदाद देने दी घोषणा कीती ऐ । अपने सौहगी सनेह च श्री सिन्हा होरें मनुक्खी जाने दे नुक्सान पर बसोस जाहर कीता ते आखेआ जे प्रशासन पीढित परोआरें गी हर संभव सहायता उपलब्ध करोआरदी ऐ ।



## Poonch Mine

पुंछ जिले च कल कब्जे आली रेखा कोल जंगल च अग्ग लगने करी केई सारे बरूदी सुरंगें आले धमाके होए । सांबा ते जम्मू जिले दे किश जंगली इलाकें च बी अग्ग लगगी गई । अधिकारिएं मताबक एहदे करी नुक्सान होआ ऐ । अधिकारिएं आखेआ जे पुंछ जिले च मेंढर सब-सेक्टर दे मनकोट इलाके च कब्जे आली रेखा कोल जंगल च अग्ग लगने करी केई सारे बरूदी सुरंग धमाके होए । कब्जे आली रेखा दे पारा थमां अग्ग शुरू होई ते इस पाससै फैली गई ।



## Poonch Mine

पुंछ जिले च कल कब्जे आली रेखा कोल जंगल च अग्ग लगने करी केई सारे बरूदी सुरंगें आले धमाके होए । सांबा ते जम्मू जिले दे किश जंगली इलाकें च बी अग्ग लगगी गई । अधिकारिएं मताबक एहदे करी नुक्सान होआ ऐ । अधिकारिएं आखेआ जे पुंछ जिले च मेंढर सब-सेक्टर दे मनकोट इलाके च कब्जे आली रेखा कोल जंगल च अग्ग लगने करी केई सारे बरूदी सुरंग धमाके होए । कब्जे आली रेखा दे पारा थमां अग्ग शुरू होई ते इस पाससै फैली गई ।



## CS-NH44

मुख्य सचिव अटल डुल्लू होरें जम्मू श्रीनगर राश्ट्रीय जरनैली शिड़कै पर दौनें बक्खी दा गडिडएं दी आओजाई गी जकीनी बनाने ते रस्ते गी ठीक-ठाक करने लेई 10 जून तोड़ी दा समां तैह कीता ऐ। इआं केन्द्र शासत प्रदेश च औंदी श्री अमरनाथ जी दी यात्रा ते फल-फस्ट सरबंधी रूतै गी ध्यान च रखदे होई कीता गेआ ऐ। मुख्य सचिव होर कल जम्मू श्रीनगर राश्ट्रीय जरनैली शिड़का पर मजूदा ट्रैफिक स्थिति ते शिड़का दी हालत बारे जायजा लै करदे हे। मुख्य सचिव होरें डलवास, मेहारद, डिगडोल, खूनी नाला, पंथाल, किशतवाड़ी पाथेर समेत जरनैली शिड़का दी माड़ी हालत दी वजह बारे पुच्छेआ ते एनएचएआई दे अधिकारिएं गी शिड़का दी स्थिति च सुधार करने लेई सब्बै मुमकन उपाह करने पर जोर पाया। डुल्लू होरें कटुआ-कटड़ा जरनैली शिड़का पर बगैर चिर लग्गे दे 20 जून कोला पैहले लुक्क पाने दे निर्देश दित्ते।



## Samba

घरत, विज्ञान ते खनन सरबंधी मैहकमे सांबा आस्सेआ पिछले दऊं ब'रे दरान 18 करोड़ रपे दी आमदन कमाई गई ऐ। अपराधिएं पर डेढ़ करोड़ रपे दा होर जुर्माना बी लाया गेदा ऐ। आकाशवाणी दे सांबा आले संवाददाता सतपाल शर्मा हुंदे कन्नै गल्लबात करदे होई सांबा दे जिला खनन अधिकारी मोहम्मद सईद होरें आखेआ.....



## RBI GDP

भारतीय रिजर्व बैंक नै मजूदा माली ब'रे च आर्थिक वृद्धि दर 7 फीसद रौहने दा अनुमान जताया ऐ। सालाना रिपोर्ट च बैंक नै आखेआ जे ब'रा 2024-25 आस्तै असल सकल घरेलु उत्पाद दी वृद्धि दर सामान्य रूपै कन्नै 7 फीसद बधने दा अनुमान ऐ। केन्द्रीय बैंक नै आखेआ ऐ जे माली ब'रे 2024 च भारतीय अर्थबवस्था मजबूत गति कन्नै बधी ऐ। इस दरान असल सकल घरेलु उत्पाद दी वृद्धि पिछले ब'रे दी 7 फीसद थमां बधियै 7.6 फीसद होई गई ऐ। रिपोर्ट मूजब माली ब'रे 2023-24 च केन्द्रीय बैंक आमदनी च सालाना आधार पर लगभग 17 फीसद बाद्धा होआ ऐ।



## J&K Files

जम्मू कश्मीर सरकार नै हुकम जारी कीता ऐ जे उपराज्यपाल हुंदे सलाहकार हुंदे कश पेदिएं फाइलें गी छोड़ियै सब्बने मैहकमें दियां फाइलां मुख सचिव हुंदे राएं हुन उपराज्यपाल होरें गी जमा करोआइयां जानियां लोड़चदियां। आकाशवाणी जम्मू संवाददाता दी रिपोर्ट मूजब आम प्रशासनिक मैहकमे नै इस सरबंधें च हुकम जारी कीता ऐ। उआं गृह विभाग दियां गैर कनूनी गतिविधिएं दी रोकथाम सरबंधी कनून यूएपीए जन सुरक्षा कनून पीएसए ते नेह मामले कन्ने जुड़ी दियां फाइलां मजूदा प्रक्रिया दे तैहत गै लमा करोआइयां जा करगंन।



## Kishtwar Yoga

आयुष मैहकमे नै जिला किशतवाड़ दे सैहयोग कन्ने अंतराष्ट्रीय योग दिवस-2024 दे सरबंधै च इक बड्डे योग कार्यक्रम दा सरिस्ता कीतां आकाशवाणी जम्मू संवाददाता दी रिपोर्ट मूजब एहदा विशे-सार हा "महिला सशक्तिकरण लेई योग"। इस कार्यक्रम दा सरिस्ता किशतवाड़ च कुड़िएं दे सरकारी हायर सकेँडरी स्कूल च कीता गेआ। एह कार्यक्रम आयुश मैहकमे दे निदेशक हुंदे मार्ग दर्शन हेठ कीता गेआ। इस कार्यक्रम च सारी महिला अधिकारिएं कुड़िएं ते तकरीबन 100 प्रतिभागिएं हिससा लैता।



## Weather

जम्मू च गर्मी दा प्रकोप अजें बी जारी ऐ। पर उआं कल दिनें दा बद्धोबद्ध तापमान 41.2 डिग्री सैल्सियस दर्ज कीता गेआ, जेहड़ा इस मौसम दे अजें तगर दे बद्धोबद्ध तापमान 44.8 डिग्री सैल्सियस थमां 3.6 डिग्री घट्ट ऐ। मौसम विभाग मूजब रातीं दे तापमान च किश बाद्धा दर्ज कीता ऐ। रातीं दा बद्धोबद्ध तापमान 32.2 डिग्री सैल्सियस दर्ज कीता गेआ।

